

全唐文

竹居跋廬

竹居跋尾

全唐文

欽定全唐文卷七百十五目錄

韋處厚

答李德裕丹宸箴詔

進六經法言表


代裴度論淮西事宜表

論裴度不宜擯棄疏

論左降官準舊例量移疏

請明察李逢吉朋黨疏

駁張平叔糴鹽法議



金史卷一百一十五
對才識兼茂明於體用策

上宰相薦皇甫湜書

翰林院廳壁記

興福寺內道場供奉大德大義禪師碑銘

欽定全唐文卷七百十五

韋處厚

處厚字德載京兆萬年人本名淳避憲宗諱改今名元和
初進士又擢才識兼茂科穆宗朝拜兵部侍郎文宗立以
佐命功拜中書侍郎同中書門下平章事封靈昌郡公太
和二年卒年五十六贈司空

答李德裕丹宸箴詔

卿文雅大臣方隅重寄表率諸部肅清全吳化洽行春風
澄坐嘯眷言善政想歎在懷卿之宗門累著聲績冠內廷

者兩代襲侯伯者六朝果能激愛君之誠喻詩人之旨在
遠而不忘忠告諷上而常深慮微博我以端躬約予以循
禮三復規諫累夕稱嗟置之座隅用比韋弦之益銘諸心
腑何啻藥石之功卿旣已投誠朕每懷開諫苟有過舉無
忘密陳山川旣遐眷矚何已必當勉已以副深誠

進六經法言表

臣聞三皇講道五帝講德三王講仁五霸講義所講不同
同歸於理理道之極備於六經雖質文相變忠敬交用損
益因時步驟不一然而釋三綱越五常而致雍熙者未之

有也自秦火蕩熟孔壁穿蠹曲學異辨專門多惑營道之軌並馳希聖之堂蓋寡蕪文錯起浮義互生簡冊混散篇章繁積勞神於累代弊形於當年其知愈博其得愈少夫然通方之士達識之儒且猶不爲也況南面之尊司道之契豈不貪其精而遺其麤者乎伏惟文武孝德皇帝陛下精義神授博識天資山峻詞峰泉蓄學海膺休運則混六合而不讓思屈已則舞兩階而不疑故當希皇踵帝肩王轡霸可以區區近躅擬於聖德哉臣處厚臣隨採合易詩書左氏春秋孝經等因其本篇掇其精粹論紀先師微旨

今亦附於篇末總題曰六經法言合二十卷獻上取諸身
必本於五事通諸物兼暢於三才始九族以及於百姓刑
室家以儀於天下聖君良主之往行哲人壯士之前言天
人相與之際幽明交感之應窮理盡性之辨藥石攻磨之
規堯舜禹湯文武理亂之道盡在君臣父子夫婦朋友之
義必舉其興可以勸其違可以戒此其所存者也至如爻
象錯綜陰陽難名比興箴誨幽隱難釋誥命訓論古今不
合威儀數制命諸有司褒貶揚摧歸諸史法此其所遺者
也商鞅之說秦王歎帝道之難行太宗之納魏徵流王澤

而廣被繇是言之道無遠近德無重輕能者挈之如毛羽
不能者舉之如嵩岱今逢希代之君當難合之運故不能
以百家邪說六國縱橫秦漢刑名魏晉偷薄爲盛時道歷
代帝王皆務纂集魏稱皇覽梁著進畧鄴中則有修文之
作江左則有壽光之書但誇衒於聞見非垂謀於理本臣
今所貴實異斯作陸賈奏甚卑之論尚稱善於高皇方朔
獻雜糅之說猶見知於武帝伏惟陛下機務之餘燕息之
暇時降省覽天下幸甚

代裴度論淮西事宜表

臣某言臣伏以方岳之任職主分憂苟事涉安危利深社稷詞得專達臣敢備言是用輕冒上聞伏惟少紓僅踰數月朝廷未議所伐臣恐日長姦謀彼將膠固士心必希倣倖啗利滋蔓事則難圖當其神情尚搖足以觀釁臣自聞少陽權主留務衆未甚寧昨知少誠之子誘扇其軍又以誅戮天其或者勦絕姦類大振皇綱陛下得不上順天心乘時廢置而又謀之遲久臣竊爲陛下惜之何則夫以少誠怙兵偷安二十餘載恩惠自己人知素懷衆之所懷必厚其子弟其勢以分臣度具聞不與者半所以人心持兩

至有動搖以斯觀之或未盡附少陽又以斬殺其子必有
疑衆之心今若及未寧出其不意擇四方節制之臣可爲
其帥者使馳而入之移少陽於他鎮以待之彼得所安必
效順承而無固衆之志則其黨自離心矣因其所離而制
其命何求而不克哉易所謂見幾而作不俟終日然以方
布大信不宜隱情若先命中貴奉明詔將告易位以誠諭
之從而後行事可以濟臣又度當今節制可以處淮西任
者莫若河中節度使王鐔寬厚慎重練識軍情必能悅慰
羣心鎮撫疑黨若將移鐔於淮西而俾與少陽不遠矣朝

廷立遷授之權而內足以除姦蠹之本使少陽感恩以效命王鶚推誠以蒞眾是淮西絕繼代之業朝廷存宏貸之德亦將以息河北狐鼠之勢示去逆效順之利自然風靡以成化從此不希於苟得矣斯事體大伏惟陛下行之議者以爲少陽兵戎賊臣曾居叛黨若將易處於關輔之地寵任以兵戎之權何異夫朝四暮三而終不離其數是不然也夫根深者難拔源長者難絕彼深結眾根其人久矣我能絕之使安植施於他以變其所庸非至計乎且事不先漸化之道而欲頓歸於大政亦難矣方今征承宗以名

聞於天下者豈不恃眾違命邀爵乎若使少陽復而行之
則其罪均矣不可獨赦則必分師以討之當淮楚災旱之
餘徵賦耗竭之日是使蒼生興流亡之歎甲兵無暫息之
時上以傷陛下子育之心下以竭邦賦資用之費得不審
慎其舉而保其成算哉伏以國家艱難已來何北戎臣竊
據州郡父歿子代兄終弟及皆朝廷稽緩其事不時即謀
使生人之心率以沿習爲患久矣陛下神畧獨斷超冠百
王事當其機宜以時革臣不勝誠懇悃款之至

論裴度不宜擯棄疏

臣聞汲黯在相淮南不敢謀反于木在魏諸侯不敢加兵
王霸之理皆以一士而止百億之師以一賢而制千里之
難伏以裴度勲高中夏聲播外夷庭湊克融皆憚其用吐
蕃回鶻悉服其名今若置之巖廊委其參決西夷北虜未
測中華河北山東必稟廟算況幽鎮未靜尤資重臣管仲
曰人離而聽之則愚合而聽之則聖理亂之本非有佗術
順人則理違人則亂伏承陛下當食歎息恨無蕭曹今有
一裴度尚不留驅策此所以馮唐感悟漢文雖有廉頗李
牧不能用也夫御宰相當委之信之親之禮之於事不效

於國無勞則置之散寮黜之遠郡如此則在位者不敢不
勵將進者不敢苟求陛下存終始之分但不永棄則君臣
之厚也今進皆負四海責望退亦不失六曹尚書不肖者
無因而勸臣與逢吉素無私嫌臣被裴度無辜貶官今之
所陳上答聖明下答羣議披肝感激伏地涕流伏乞鑒臣
愛君矜臣體國則天下幸甚

論左降官準舊例量移疏

伏見赦文節目中新左降官有不該恩澤者在宥之體有
所未宏臣竊聞物議皆言逢吉恐李紳量移故有此處置

若如此則應是近年流貶官因李紳一人皆不得量移事
體至大豈敢不言李紳先朝獎任曾在內廷自經貶官未
蒙恩宥古人云人君當記人之功忘人之過管仲拘囚齊
桓舉爲國相治長繆紕仲尼選爲密親有罪猶宜滌蕩無
辜豈可終累況鴻名大號冊禮威儀天地百靈之所鑒臨
億兆八紘之所瞻戴恩澤不廣實非所宜臣與逢吉素無
讐嫌與李紳且非親黨所論者全大體所陳者在至公伏
乞聖恩察臣肝膈倘蒙允許仍望宣付宰臣應近年左降
官並編入赦條令準舊制得量移近處

請明察李逢吉朋黨疏

臣竊聞朋黨議論以李紳貶屈尚輕臣受恩至深職備顧問事關聖聽不合不言紳先朝獎用擢在翰林無過可書無罪可戮今羣黨得志讒嫉大興詢於人情皆共歎駭詩云萋兮菲兮成是貝錦彼譖人者亦已太甚又曰讒言罔極交亂四國自古帝王未有遠君子近小人而致太平者也又古人云三年無改於父之道可謂孝矣李紳是前朝任使縱有罪愆陛下猶宜洗釁滌瑕念舊忘過以成無改之美今逢吉門生故吏遍滿朝行侵毀加誣何詞不有所